

«La femna da nagliur»

Tgi è guvernatura Sarah Palin?

DA GUIU SOBIELA-CAANITZ

■ Il magazin «The Economist» (Londra) dals 6 da settember 2008, sut il titel «The woman from nowhere» («La femna da nagliur», p. 52), ha publictà ina caricatura curiusa. A sanestra triumfescha senatur John McCain cun la tgiralla ed il mantè cotschen dal magi. Cun il maun sanester tegna'l il maun dretg d'ina femna traglischanta che cumpara or d'in cilindar cun in bastun da hockey sin glatsch, entant ch'il maun sanester tegna ina buis. A dretga davosvart stat Barba Sam, il vischin american incharnà, che sa sgratta il chau perplex e consternà. Il commentari sutvart declera il maletg. La dunna è la «hockey mum» Sarah Palin, 44 onns, ferventa chatschadra e guvernatura da l'Alaska, che McCain ha gist tschernì sco candidata da la partida republicana a la vicepresidenza dals Stadis unids. Barba Sam represchenta quels blers Americans che n'èn tuttina betg persvas da la tschernina. I vala la paina da leger commentaris davart lezza femna; ella vegniss presidenta, in cas che McCain, cun 72, guda gnass l'elecziun dals 11 da november 2008 e muriss u sa retirass silsuenter avant la fin da 2012.

Candidata dals fundamentalists

Il republican McCain candidescha per l'elecziun presidenziala il di da s. Mar-

tin. Dentant na correspundan ni sias ideas, ni ses passà matrimonial, a las aspectativas d'in sectur relevant da l'electorat republican, numnadamain «the born-again block», ils fundamentalists cristians (23% da la populaziun creschida). Ils strategs republicans vulan cuntanscher che lezs «evangelicals» na restian betg a chasa ils 11 da november, mabain gajan massivamain a vuschar «McCain for President». In tric ha sa verificà en lez senn: Vegnir encunter al sectur demografic en dumonda cun determinar la candidatura a la vicepresidenza. En la partida republicana han ins pia tschertgà ina persuna che persvadia ils fundamentalists cristians e ch'ins posia preschentar en tandem cun McCain. Quai n'è betg i tgunsch. Mike Huckabee, l'antierur guvernatur da l'Arkansas, na steva betg pli a disposiziun. Ils «sabis» da la partida han refusà duas persunalitads proponidas da McCain: Senatur Joe Liebermann, aderent da president George W. Bush areguard la guerra en l'Irac, e Tom Ridge, antierur guvernatur da Pennsylvania. McCain da sia vart ha refusà il candidat dals «sabis», l'antierur guvernatur mormon da Massachusetts Mitt Romney, e tschernì Palin en il davos mument. La dieta republicana, be fieu e flomma, ha beneventà la candidata, tant pli che lezza defenda il dretg da vischins americans da posseder in'arma en chasa: «Ils conservativs

han argumentà ch'ella persunifitgeschia 'l'America genuina', sco mamma che gioga hockey sin glatsch e chatscha elans [strusch parents americans dals rens, G. S.-C.], sco dunna d'in lavurer dal petroli; (...) ses tschintgavel uffant è impedì (...). Ma ella, guvernatura d'in stadi da 670 000 olmas dapi gnanca dus onns, è la candidata la pli pauc experimentada d'ina partida gronda en l'istorgia contemporanea (...). Ella n'ha mai s'interessada da politica exteriura (...). Quai metta seriusamain en dumonda la moda e maniera co che McCain decida; (...) i fa insumma quità areguard la qualificaziun da la partida republicana per governar» («The Economist», 6 da settember 2008). Tge cuncontrast cun il candidat democratic, senatur Barack Obama! Lez, conscient da sias largias areguard la politica exteriura, ha tschernì da furmar in tandem cun senatur Joe Biden, veteran en chassa dapi decennis. I na para betg che bleras aderentas antieruras da Hillary Clinton sappian vuschar per la candidata fundamentalista. Da l'autra vart n'èsi betg segir ch'il «born-again block» saja tuttina ferm sco dal 2004: «Ins na sustegna pli uschè ferm la moralità tradiziunala, ma ins è vegnì pli critic envers l'implicaziun da la Baseldgia en la vita politica, entant ch'ins sustegna dapli l'assistenza sociala; cunzunt ils catolics sa spostan enavos, plaun a plaun, vers la partida democratica. Pa-

lin e ses aderents pudessan stimular l'opposiziun dals laicists americans (...). Ils problems principals da McCain derivassan finalmain, na dal pauc entusiassem dals fundamentalists, mabain da lur entusiassem memia grond» («The Econo-

mist», 13 da settember 2008, p. 50). Per las emnas vegnentas astg'ins spetgar tensiun e novitads, tant pli che la crisa finanziaria n'è tuttina betg a fin e che sias consequenzas socialas ston anc sa mus-sar.



Sarah Palin è ina dunna dispitavla.